

四明叢書

張宗祥



四明宋元

僧詩

四明張氏約園開雕

序

士之負瓌奇夔絕之材而無所用其能往往伏於山野
淪在塵市其或有託而逃激焉遯世則又多隱迹浮屠
故其雖爲佛子於儒術多通曉而工詩歌者尤眾竊嘗
怪古之儒學如韓歐蘇氏者每喜與方外之士游且時
時稱述其詩文然其詩文傳者亦罕豈其本無足傳歟
抑搜輯之人少哉乃者余旣獲董氏震軒所輯四明宋
元僧詩二卷讀之作而歎曰是豈非負瓌奇夔絕之材
而無所用其能者邪嗚呼亦可謂善隱者矣顧若大覺

師之遇宋仁宗大慧師之遇孝宗亦何至無所用其能而必出於逃禪則又何也余聞客談有楚人黃念劬者始從張廉亭王益吾兩先生游既值清室不綱謀傾覆爲人長記室事敗泛海至普陀遂爲僧會有顯者來故人也寺僧強使募化因又棄僧不爲竟窮老死其詩則益工而在普陀所爲詩尤奇絕儻所謂激焉遯世者非與余疑方外詩人行迹率如此若覺慧諸公其罕焉者耳至於雅耽山居游心禪悅斯則慧心獨具與彼高人雅致同一懷抱也劉氏仁本題弘覺師書樓詩云青山

湖上老僧居百尺危樓萬卷書架插牙籤朝旭上香消
古鼎夜窗虛欄干竹色浮蝌蚪枕簟芸香落蠹魚近憶
校讎人未遠雨花零亂獨躊躇此蓋不僅爲詩僧矣今
此書所錄宋詩僧二十八人比丘尼啞女與焉元詩僧
十九人道士鄭守仁與焉錢氏鳳翰又爲附道士呂希
夷一人於元詩僧後尙不足五十人卽以宋元僧之在
四明論其闕焉不見姓氏者猶多何況伏山野淪塵市
而弗隱夫禪者則益不可勝道也嗚呼天之生材有限
而令託焉而逃之其逃之者止水涵空孤雲自在墮甌

萬事枯木不花計則得矣然人間垂楊誰與拂拭官街
鐙火渾點脂膏世味艱難一念萬劫尙餘窮相一雙手
要向諸方痒處搔誦道冲僧詩益不盡感慨係之矣是
爲序時民國二十一年四月張壽鏞

序

四明宋僧詩一卷元僧詩一卷亡友董君震軒所輯也
君喜茹素口不識酒味舒鳧舒雁之類未登於庖有僧
性焉設帳授徒恆在名山古剎中遇方外友談論娓娓
不倦與余同癖余家距阿育王不四五里君訪余輒拉
之偕遊迤入天童山繙閱藏經累日而返每謂余曰杲
堂選甬上高僧詩寥寥十餘家意在以詩存僧而非以
僧存詩不足稱美備也盍廣之乎余諾君遂自任宋元
而以明代歸余其兄覺軒先生素不喜禪君嚴憚之未

敢告也壬申秋君臥疾於家余買扁舟訊君病榻君出
所輯詩示余曰吾稿已成將俟君成書後可併刊之不
三月而君歸道山矣始余與君約明代詩僧海外爲盛
擬將東遊普陀一訪著述而飢驅奔走卒未有暇所選
之詩迄不能脫稿今覺軒先生成進士行赴西江尙不
知介弟之書存留余手余冉冉老矣恐成帙無期致負
亡友之託爰述緣起序而歸諸先生先生其以此二卷
先付手民亦足慰介弟纂錄之意而吾書之成不成姑
無庸計也天假歲月或能踐息壤之約猶當浼先生刻

之矣光緒戊寅年二月同縣吳德機蘅塘序

甬東正氣集卷三

鄞縣董琅純齋編輯

楊文瓚

字贊玉一字圓石崇禎十二年舉人唐王時官貴州道監察御史歸里殉節魯王贈右僉

都御史國朝賜諡烈愍

四難六失疏

奏爲剖心瀝血痛陳時事中興有萬不易爲之勢有萬不可失之機有萬必當爲之事懇乞聖明俯察以罄愚誠以答天眷事臣幼愚罔識荷蒙主上破格超擢隆遇千古未有自反悚仄報效莫從惟一腔熱血斧鉞不避

碎首無辭庶可仰答朝廷俯質衾影臣不識忌諱請痛哭直陳之古云勦業難而中興易臣謂中興十倍勦業是必具旋乾轉坤之略兼臥薪嘗膽之志稟英明神武之志兼審時觀變之識而後可爲恢復之事所謂智勇深沈堅忍以濟也故自來中興之盛必推光武臣觀今日之勢與光武甚相侔又正與光武大相異光武承莽篡之後不過綱紀陵夷人心散亂故一反而輒定今寇橫於前敵驕於後兩京淪陷瓦解土崩此不易爲者一光武時卽公孫述隗囂王郎諸寇雖一時並起可徐爲

勘靖亦可因藉爲功今豫楚川陝亂離已非一日而積
貯空虛人民凋瘵此不易爲者二光武起兵舂陵合平
林入武關取洛陽據中原以控天下地利最勝今海隅
偏陬危卵勢逼此不易爲者三昔平林諸將小敵怯大
敵勇雲臺濟濟復見漢儀今名勲數藩而外落落鮮儔
此不易爲者四然恭逢主上智勇天錫日月重開旣得
熊貔之干城復獲帝賚之良弼且八閩天險可以制勝
此天所以資主上爲中興基也矧寧紹義旅奮起壁壘
江上雲望王師不能朝夕主上若奮揚威武順天應人

正在此日所謂萬不可失之機也乃不審緩急之勢察遠近之情發雷厲之令以振赫然之怒致守者復失聚者復散以聖明神武之主而反令天下有王業偏安之惑臣竊爲主上痛之臣亦不能爲主上解之也此所失者一也夫得天下有道得其心而已親征一詔引領以待主上若如期而發暫出劍津隨發一師隨遣一將陸續接應以慰輿情以鼓兵氣則四方固知主上誓師之誠亦昭知主上恢勦之志後蘇我后日可俟已乃一月而數易其期而參差其事人不諒主上之艱難措置而

反議發憤未雄是不以詔服天下反以詔疑天下也此
所失者二也凡所遲滯總以爲師行糧從司農告匱之
故然光武不階尺土何處積有數百萬金錢卽今鎮臣
方國安義師數萬亦豈俟饟足行師耶且八閩烽火無
警征賦如故卽先以舊饟給舊兵便可徵發隨議搜括
議勸輸議徵解時可協應軍前何患脫巾之變且讐不
共天滅此朝食古嘗有備三日糧以決勝者主上奮旅
一舉宜一心恢勦專事兵饟餘可勿問則心專而物力
亦聚經營一月卽可爰方今主上自正位以逮今雜費

亦幾數十萬乃偏於兵饗不給者何也此所失者三也夫閫以外將軍制之運籌幃幄決勝千里衝鋒折俎賴有前驅主上若先選一副將勇敢當先而大將軍以爲後勁則進可賞之以功退可加之以法庶令行禁止師出以律今遠不及制而近不可期此所失者四也夫爵祿所以奔走天下也豪傑之士皆有富貴之心故戰必勝攻必克懋爵賞以待膚功不然爛羊之詭古譏之矣今元勳重藩再造中興此心明同日月功冀河山卽酬以寵恩不爲過乃若勳未建而爵先盡則泰生驕驕生

佚成暮氣矣此所失者五也夫治國之道首先節用況
今軍旅煩興苦無點金之術今主上仰屋深憂而資予
頻繼雖云激勸微權然以緊急之需應不急之用獨不
念江干兵卒至今有單衣臥雪者耶此所失者六也以
此六失當彼四難臣所爲痛哭直陳而不能爲主上解
之也然主上今悟矣決矣天下事其猶可爲矣臣見親
征牌發定期朔日申令必行臣不勝爲天下喜爲主上
賀竊亦爲身家慶臣自同錢肅樂等協力起義已捐軀
不顧又何有乎功名然矢力戰守者無非欲還一抔淨